

ÆGYPTUS  
TRIUMPHATA.  
Poema Sacrum.

---

Autore  
*WILH. DILLINGHAM, S.T.P.*

---



79. D. 25.  

---

LONDINI,  
Typis Milonis Fleisher, & prostat apud Ric. Royston,  
Sacrae Regiae Majestatis Bibliopolam. M DC LXXX.

574.

Grl 4.  
7/m

Plan

# ÆGYPTUS TRIUMPHATA.

**M**agni gesta Dei , cœlo qui fulminat alto,  
Omnia qui solo nutu fecitque regitque,  
Idem Exercituum Dominus, cui militat æther,  
Et conjurati veniunt ad classica venti,  
Dicere fert animus, plenûmque horrore duellum.

Tu, Vati magno qui tot miracula rerum  
Et facere, & scriptis committere posse dedisti,  
Spiritus alme, meam perfundas lumine mentem,  
Et rebus dignas dones in carmina vires.  
Sic Tibi non ficto famuletur carmine Musa:  
Sic aliqua è nostro surgat Tibi gloria versu.

**Q**uamprimûm Omnipotens, magnus, sanctûsque *Jehova*,  
*Ærumnas* populi & casus miseratus iniquos,  
Promissisque memor Patribus quod fecerat olim,  
*Isacidas* voluit *Phariis* excedere terris,  
Venit in *Ægyptum* *Moses* , legatus ab alto  
Interpresque Deo ; non jam tremebundus, ut olim,  
Cùm Regis fugiens iras, patriamque novercam,

Magnæ divitias & honores linqueret aulæ;  
 Sed fidens animi, Cœli diplomate, toto  
 Armatusque Deo; nulli violabilis hosti.

Namque huic Omnipotens, foci dum pasceret agnos,  
 E flagrante rubo divinas edere voces,  
 Ut populum educat, quamvis frendente Tyranno;  
 Multaque *Niliacis* edat miracula terris.  
 Quoque fidem faceret præsens illi affore Numen,  
 Et rata facturum quæcunque pararet ab Ipso,  
 Inficiensque manum leprâ, sanansque monebat;  
 Inque anguem virgâ conversâ, iterumque receptâ.  
 Restabatque aliud, magis & mirabile, monstrum;  
 Virga manet quæ virga fuit, mutatur & ipsa:  
 Non specie, at virtute tamen mutatur, & usu.  
 Nam modò quæ fuerat pastoris virga, pedumque,  
 Nunc eadem sit virga Dei, sceptrumque Tonantis;  
 Quo populumque regat *Moses*, & conterat hostes,  
 Mirificisque modis flectat mortalia corda.

Hâc valuit totum convellere sedibus Orbem,  
 Naturamque ciere omnem, novitque citare  
 Innumeras acies parvarumque agmina rerum.  
 Fulgura cum tonitru potuit deducere cœlo,  
 Ac tenebras Erebi certis affundere terris;  
 Quinetiam populis diras immittere pestes.  
 Noverat & liquidi fluctus siccare profundi,



Et puros latices duris depromere saxis.  
Noverat immanes terræ diffindere fauces,  
Mortalésque etiam vivos demittere in Orcum.  
Sic voluit Numen, jussit cùm sumere dextrâ  
Argumentum ingens Sacramentúmque *Jehovæ*.

Ergò ubi tendenti *Ægyptum* est comes additus *Aaron*,  
Germanus frater, fidus, fandique peritus,  
Auspiciis monitúque Dei; tum protinus ambo  
*Hebræam* gentem invifunt, prolémque *Jacobi*,  
Tunc *Ægyptiacæ* telluris parte per annos  
Bis jam ducentos, peregrinâ sede, morantem,  
Ac vitam miserè vix, sub tortore, trahentem.

Ah falsa *Ægyptus*, nullísque invifior aufis!  
Siccine apud memorem veteris stat gratia facti;  
Cùm te *Josephus*, divinâ præditus arte,  
Eripuit letho, strigosáque monstra peremit;  
Cùm totam *Ægyptum* regali acquireret aulæ,  
Atque Orbis gazas *Pharaonis* conderet arcis?  
Hospitii sic jura tenes, gens perfida? quámque  
Allèxti quondam; fatagis nunc perdere gentem?  
Non sic pollicitus *Pharao* dum vita manebat;  
Non ità credebat *Josephus*, providus Heros;  
Perfidiam aut tantam poterant sperare nepotes,  
Qui còstos inter lateres uruntur & ipsi,  
Duris imperiis pressi, duróque labore.

His mandata Dei pandunt ; útque ille suorum  
 Respexit duros oculo miserante labores.  
 Quin etiam tempus quoque nunc instare monebant ,  
 Quo Deus hos gente ex ista , vel vindice dextrâ ,  
 Eriperet , sanctisque daret confidere terris.

Ac veluti in patriam reducis ( quem militis ira  
 Captivum abducens diuturno carcere clausit ,  
 Tandem at libertas , multos sperata per annos ,  
 Respexit miserum , patriâque in sede locavit )  
 Mutatos vultus vix agnovêre parentes ;  
 Postquam at paullatim emergit , crescîtque tuendo ,  
 ( Compertis matri signis testantibus ipsum )  
 Itur in amplexus , atque oscula dulcia figunt :  
 Sic *Hebræorum* tristes , multosque per annos  
 Tristibus assuetas pertentant gaudia mentes ;  
 Et primò suspecta quidem ; at miracula postquam  
 Conspectère manûs virgæque , sigilla Tonantis ,  
 Evigilare sibi visi , mox pectore toto  
 Lætitiâ accipiunt , & cœli Numen adorant ;  
 Imperium agnoscunt , monitis parêre parati.

Tum gemini fratres , *Moses* ac fidus *Aaron* ,  
 ( Quos & Primores populi comitantur euntes )  
 Regis ad augustas ædes vestigia flectunt.  
 Quem quum convenêre , incedentémque superbè  
 Conspectuisse datum , concessâque copia fandi ,

Sic prior huic *Mosès* : “ Magnus Sanctusque *Jehova* ,  
“ Quem nos *Hebræi* colimus, Deus, hæc tibi dicta &  
“ Jussa referre jubet ; Populum dimittito nostrum ,  
“ Sacra mihi ut faciat , laterum securus, Eremo.  
“ Tridui abhinc iter est. Proles dilecta *Jacobi*  
“ Est primogenitus mihi ; Tu dimiseris ipsum.  
“ Ni facias , faciam Ipse tuus moriatur ut Hæres.  
“ Hic specimen specitur ; sunt hæc mandata Tonanti.

Dixerat. At *Pharao* , furiatâ mente superbus ,  
Constitit , insolitâ defixus imagine rerum.  
Haud aliter quàm si Venator quando leonem  
Securè gradientem , occultus tegmine sylvæ ,  
Vulnerat infixâ per dorsum immane sagittâ ;  
Is stupet attonitus primùm ; mox colligit iras  
Ingentes , oculoque truci circumspicit hostem :  
Sic *Pharao* ingentes motus in pectore versat ,  
Et , varius, mentem nunc huc , nunc dirigit illuc ,  
Incertus num bella paret ; num perderet omnem  
*Hebræam* gentem ; aut confunderet ossa cerebro  
Legati, qui voce ausus temerare minaci  
Haud unquam dictis assuetas talibus aures.  
Sed postquam immanes animus decoxerat iras,  
Sic visus sapere est. Quoniam nulla arma parare  
Viderat , at nudis Vatem confidere dictis ,  
Ac impunè minas contemni posse putabat ,

Ergò placet ludus, verbisque retundere verba.

Tandem hæc subridens mente indignante reponit.

“Ecquis at ille Deus, qui nostra invadere regna

“Cogitat, *Ægypto* ac nostros abducere vernas?

“Nam neque, quem memoras, Dominum scio; nam neque iussa

“Ignavus patiar; Populum dimittere nolo.

Tum *Mosès*. “At siqua tamen miseratio nostri,

“Hanc veniam oramus, (saltem miserere tuorum)

“Oramus, per te liceat parère Tonanti.

“Nè nos committas (petimus) cum fulmine; neu sint

“Imperia imperiis, jussis contraria iussa.

“Quin liceat nostrum sacris placare *Jehovam*;

“Nè nos, neglectus, ferro vel peste sequatur.

Talibus orabant Regem sermonibus. atqui

Non magis ille malis populi, precibusve movetur,

Quàm si dura filex, aut stet *Marpeſſa* cautes.

Quinetiam precibus stomachum sibi ducit ab ipsis;

Concipiensque novas flammæ mens sæva Tyranni

Et resides animos incusat, dictaque vana;

Affirmatque vetus, subducto stramine, pensum.

Ergò *Niliacos* latè sparguntur in agros,

Materiemque operi stipulam, pro stramine, quarunt.

Talis vere novo volucres, ubi, prolis amore

Impulsa, fatagunt geniales condere nidos,

Exercet per rura labor, campoque per omnes

Mittit,

Mittit, ut exiguis quærant sarmenta tigillis;  
Stramineâsque trabes, & parvæ vellera lanæ,  
Aut molles plumas, teneris cunabula Natis,  
Conquirunt, rostrisque ferunt ad pendula testæ.

Interea lateres, sed non & verbera, cessant;  
Nec profunt quicquam miseræ justæque querelæ.  
Sudant, cæduntur, plorant, nec quid datur ultrâ;  
Sûntque rei vultus, & habent suspiria crimen.

Ergò iterum ad Regem tendunt, abitúmque reposcunt  
*Amramidæ* fratres. *Pharao* sed, fervidus irâ,  
Quæque fides illis sit, quæque potentia, quærit  
Numinis ignoti, quæ tantos vindicet ausus.  
Tum *Moses*; En dextram, en ipsa *Sigilla Jehovæ*.  
Projecitque simul *Virgam*. At (mirabile visu!)  
Vix terram tetigit, cùm, attollens flexile collum,  
Jam *Serpens*, traxit finuosa volumina dorfi;  
Ardescénsque oculis, & vibrans spicula caudæ,  
Intentâtque minas, ac toto sibilat ore.

At *Pharao*, quanquam conspecto exhorruit angue,  
Incantatores *Jannem Jambrém*que vocabat,  
Ut verum falsâ mirac'lum eluderet arte,  
Indigenisque diis veteres servaret honores.  
Hi, tacitè veterem *Serpentem* in vota vocantes,  
(Fallere mortales solitum sub imagine veri)  
Exuvias veteres solitâsque resumeret artes,

Projiciunt virgas. Tum virgis ecce colubri  
 Suffecti veri subductis ; indita virgis  
 Vel potiùs species oculos perstringit , & omnes  
 Serpentum flexus variè mentitur , & iras.  
 Verùm turba Magis plausum dum fortè parabat ,  
 Actutùm falsos ( en ) verus devorat anguis ,  
 In nihilum redigens , virgæ formamque refumit.

Nondum at Virga valet *Pharaonis* flectere mentem.  
 Hanc ergò *Moses* , monitu jussuque *Jehovæ* ,  
 Vibrari jubet. Illa *Ægyptum* vulnerat omnem ,  
 Omnis & in fœdum conversâ est unda Cruorem.  
 Horruit , innocui malè conscia sanguinis, unda ,  
 Erubuitque simul. Jam flumina sanguinis ibant ;  
 Quin & se fluctus fugiuntque fugantque vicissim.  
 Ipse suum *Nilus* nescit defendere numen ;  
 Miraturque novos fluctus , atque abdicat undas ;  
 Et septemgeminò tetrum vomit ore cruorem.  
 Non bibit , at fugit ipse suas Crocodilus arenas ,  
 Atque croco plùs rubra timet ( neque respicit unquam )  
 Flumina , purpureo vidit quæ crescere fluctu.

Crudelem gentem meritò potare recusat ,  
 Sanguinis innocui sitientem , fœtidus humor ;  
 Servorumque cibos corrumpunt flumina pisces.  
 Quin fluviùs talis si pergeret arva rigare ,  
 Strigosa pecudes iterumque hæc arva tenerent ,



Nec spicam inveniant qui nunc quoque stramina poscunt.  
Hoc etiam simulare Magi, plaudente Tyranno;  
Nec potuit Sanguis mollire adamantina corda.

Quocirca Omnipotens iterum protendere virga  
Mirificam Fratres jussit. Quando, ecce, repente  
Cuditur in Ranas *Nilus*; per stagna lacúsque  
Quod cruor antè fuit saltantes induit artus,  
Et ripas superans totis infunditur agris;  
Diluviúmque novum patitur *Memphitica* tellus.  
Nec domus ulla fuit ranis immunis ab istis.  
Turba coaxantúm regales occupat ædes;  
Quinetiam invadit thalamos lectúmque Tyranni,  
Ac dulces raucis somnos clamoribus arcent.

Qualiter in populi sæce est si quando coörta.  
Seditio, sævíque animis ignobile vulgus,  
Nullus eis pudor est, non illos purpura Regum  
Continet officio, aut legum, jam spreta, potestas;  
Regibus insultant, aures clamoribus implent,  
Turpia de plenis fundunt convitia buccis,  
Nil non audentes, possunt quia temnere vitam:  
Haud aliter ranæ; contactu quæ omnia fœdant  
Immundo. frustrà multus rigidúsque Satelles.  
Seditiosa cohors tota bacchatur in Aula.

Non tulit hanc speciem *Pharao*: namque arte valebant  
Hanc augere Magi, sed non depellere pestem.

Tum jubet accersi *Mosen*, supplexque petebat  
Auferat ut Ranas, abitumque paciscitur ultro.  
Ut verò ablatas sensit, pestemque remotam,  
Cor iterum obdurat, promissaque vana resorbet.

Haftenus Unda tulit sacrae miracula Virgæ;  
Proxima Terra subit. quæ, vix percussa, ministrat  
Innumeras acies peditum; qui, pulvere creti,  
Natales poterant Regi objectare superbo.  
Cui modò sunt fratres, poterant tamen esse nepotes;  
Namque hominum similes producunt corpora vermes.  
Infestat pecudésque hominésque hæc turba molesta;  
Quin Regi sese insinuat mendica caterva,  
Atque opicis fodicant rostris regalia membra.  
Non Majestatis crimen, non serica vestis  
Absterre potest. quin stat torquere Tyrannum;  
Nec missura cutem, nisi plena cruoris, hirudo.

At, quamvis harum *Pharaoni* copia rerum  
Magna satis fuerit, *Mosè* tamen usque repugnans,  
Atque Deo vero nolens concedere numen,  
Vult artes magicas similes producere Vermes.  
Officiosa cohors operi se accingit, & omnes  
Intendit nervos, Erebumque in vota vocantes,  
Ter sunt conati similes producere vermes,  
Ter lusere operam. Quanquam non carmina desunt,  
Carmina nil prosunt. languent; neque quid datur ultrá.

Dedecus hoc erit æternum criménque Magorum.  
Succubuit Dæmon, vel se quoque iudice, victus,  
Agnovitque simul, *fuit hæc manus Omnipotentis.*  
Incantatorum fileat miracula *Memphis*;  
Nec *Pharao* posthac magicas exerceat artes.  
Vicit (Io!) tandem Magnus Sanctúsque *Jehova.*

Sed nondum vicit *Pharaonis* faxea corda.  
Protinus ergò Aër Muscarum fundere nubes;  
Quæ subitò ex oculis tollunt Solémque diémque.  
Non gens una fuit; totus conscribitur aër;  
Cuique suus lituus, cum multi-coloribus armis.  
Incubat *Ægypto* mox (ecce) volatile bellum;  
Utque priùs cœlum, nunc terram contegit omnem,  
Incestant cunctos hominúmque boúmque labores.  
Pars intrans humilésque casás, turrésque superbas,  
Involat in faciem Dominis. non lumina, non his  
Ora vacant; dum quis respirat, & attrahit hostem;  
Præsentémque viris intentant spicula mortem.  
Pars pecora invadunt; œstris quæ percita diris  
Diffugiunt, longísque implent mugitibus auras.  
Tum Rex accersit *Mosém*, &, quasi cedere visus  
Sacra Deo ut faciant, ægè concedit Eremum;  
Orat at enixè pestes averteret istas.

Annuit Omnipotens *Mosè*, pestémque removit.

Sed non promissis stabat Rex perfidus. Ergò

Ecce malum gravius , multoque nocentius illis.  
Illa etenim , fœda ut fuerint , sat̃s atque molesta ,  
At sævituri tantum præludia belli :  
Hoc tulit exitium , & non evitabile fatum.  
Nam subitò ( en ) pecudum venas imasque medullas  
Intrat dira Lues , sævitque in corpore toto.  
Nec mora , corripiunt præcordia dira venena ,  
Et pecudum omne genus campis expirat apertis.  
Hinc bellator equus , lætis dum pascitur herbis ,  
Lethale accipiens telum , sine voce tubarum ,  
Concidit exanimis , vitamque relinquit inultam.  
Hinc oneri , mortique simul , succumbit afellus.  
Nec labor aut benefacta valent prodesse juvenco ;  
Nam spumis mistum fumans vomit ore cruorem ,  
Ac medio sulco moriens procumbit humi bos.  
Quin & lanigeræ pecudes , dum gramina carpunt ,  
Peste cadunt , tostasque animas sine crimine reddunt.  
Ast *Hebræorum* nullæ moriuntur in agris ;  
Nec muscæ obfuerant pecori , pecorisve magistris.  
Nempe Deus certâ librat sua fulmina dextrâ ,  
Nec finet ille suos alieno vulnere lædi :  
Pestis & ipsa Dei populum discernit ab hoste.  
Noverat hoc *Pharao* , remque exploraverat omnem ;  
Non tamen abstinuit : Domino manet usque rebellis.  
Felix alterius didicit quicumque periculis

Posse carere suis, propriumque avertere fatum.  
Innocuæ pecudes hominum delicta luebant,  
Et documenta dabant, nè pergat temnere Numen.  
Sed quoniam humanas nequeunt ea flectere mentes,  
Ipse reus meritas persolvat corpore pœnas.

Ergo in conspectu Regis, jussuque *Jehovæ*,  
*Moses* (ecce) manu cinerem spargebat in auras  
Adversus cœlum. cineri cœlum indidit iras,  
Pestiferam & rabiem; quin & simul addidit alas,  
Jussit & hunc totas *Ægypti* ferre per oras.  
Continuò invadit pecudésque hominésque venenum,  
Ulceribus fœdis cunctorum membra perurens.  
(Haud majus *Libycis* homines exercet arenis  
(Tormentum, quoties inflixit vulnera prester,  
Quàm modò *Niliacos*; Furia quorum ulcera dira  
Exagitant fodicântque atro stillantia tabo.  
Ulceribus pleni, præ morbo, præque pudore,  
Non valuère Magi coram consistere *Mosè*.  
Sed neque Rex erat ipse malis immunis ab istis.  
Nempe, (scias) *Pharao*, dedit hæc tibi munera fornax,  
Sic *Hebræorum* crudeles ulta labores.

Sed nequirit durum fornax mollire Tyrannum,  
Nec solitum curare cutem cor ulcera curant.  
Forfitan at duram motura Tonitrua mentem,  
Hactenus ad cunctos quamvis occalluit ictus;

Et, quem non digitus, moveat vox Omnipotentis.

Mirificus Regem Vates, ( ut sæpius antè )  
 Ni tempestivè sapiat, magnâsque novâsque  
 Tempore signato venturas præmonet iras ;  
 Disceret ut certâ mundum ratione moveri,  
 Et cuncta ad nutum fieri placitûmque *Jehovæ*.

Proxima surgebat tenebris aurora fugatis,  
 Aspersitque diem rebus ; tenet omnia risus,  
 Latâque sylvicolæ modulantur carmina Musæ.  
 Sola suis *Philomela* modis insistit, & addit  
 Luctibus, instantis quasi jam sibi conscia fati ;  
 Funeris atque sui ceu præfica tristè canebat.  
 Quum subitò cœlum nubes ( en ) occupat atra,  
 Involvitque diem totum ; partésque per omnes  
 Cæcum murmur discurrîtque animâtque manip'los,  
 Exacuens iras ; solet ut leo verberare caudæ.  
 Ut primùm at fuerant Virgæ data signa, repentè  
 Irruit in terras cœlum, cœlique ruinæ ;  
 Haud aliter quàm si fractus succumberet axis.  
 Scilicet horrifico cœlum tonat omne tumultu,  
 Et Tonitru ruptis displodit nubibus æther.  
 Utque ubi dispositas acies nova machina belli  
 Impetit, ac densas perrumpit fulmine turmas,  
 Cum sonitu glandes, ac mistos glandibus ignes  
 Evomit : haud aliter vibratus ab æthere Fulgor



Cum tonitru venit, ac immanis Grandinis imber.  
Nec vanus fulgor, sed vivax flamma per omnes  
Discurrit campos, intéorque ruentia tela  
Interjecta furit, sacrásque ulciscitur iras.  
Sed neque grando fuit, qualem risère puellæ,  
Increpitat quoties tectis, patulásque fenestras  
Intrans innocuè coràm subsultat in aula :  
At grandes lapides, mortis certissima tela ;  
Quales non unquam vidit *Memphitica* tellus,  
Nec cœlum *Ægypti* tulit ex quo tempore primùm  
*Æquoreas Nilus* se præcipitavit in undas.  
Non lapis immensus *Balearide* tortus habena  
Tantum mortis habet. Lapidosæ grandinis ictu  
Hordea perduntur, perierunt gramina campis,  
Arboribúsque comæ ; volucrum gens atque ferarum ;  
Et pecudum quicquid campis errabat apricis ;  
Atque viri, si qui monitis parére recusant,  
Nec curant sese jussis abscondere tectis.

Horrores istos oculis atque auribus hausit,  
Contremuitque simul genibúsque animis, Tyrannus.  
( Ut quondam, à *Caliga* duxit qui nomina, fertur  
Sub lecto tonitru metuens trepidásse Tyrannus. )  
Tunc *Mosis* criménque suum, criménque suorum,  
Numinis & justas iras, plagásque fatetur ;  
Ac se pollicitus jussis parére paratum,

*Ægyptus triumphata.*

Tantum orat velit ut talem depellere pestem.

Contendit precibus *Moses*, precibusque *Jehova*

Annuit, ac cælum tempestatéque serenat.

Sensit ut hoc *Pharao*, filicem criménque resūmit:

Cessat ut automati, sublato pondere, motus;

Et ferrum candens induruit igne remoto.

Ah misera *Ægyptus*! nec dum saturata peric'lis?

Diluvio ex isto paullatim emergere cœpit,

Spémque novam messis promittere naufragus annus.

Triticeam sobolem nunc Sol producit in auras,

Quam nuper tellus, indulgentissima mater,

Abdiderat gremio, metuens à grandinis ira;

Sub foliisque novis fructus modò parturit arbos,

Lætáque cum miseris decidunt arva colonis.

Jussus at ( en ) *Moses* celeres virgâ evocat Euros,

Qui subitò innumeras apportavêre Locustas.

( Tales *Ægyptus* nunquam conspexerat antè,

Venturis annis nec erat visura locustas. )

Quæ caput armatæ galeis, pectus cataphractis,

Visæ sunt equitum speciem præferre volantùm,

Ponderi inæquales dum ventus sublevat alas.

Protinus invadit populatrix turma tenellas

Arboreas frondes; tum fructus devorat, & quas

E postliminio tellus produxerat herbas;

Ac spes triticeas, & quicquid grando reliquit

Graminis

Graminis & fructûs. ipsæ periêre ruinæ.  
Ingens agricolas hinc desolatio cepit ;  
Omnia perdiderant , nec spes erat ulla renasci.  
*Ægyptus* nec tota in prædam sufficit hosti ;  
Quin etiam tecta invadunt ut pabula quærant ,  
Instantesque viris ora esurientia pandunt.

Commovit Regem facies tristissima rerum,  
Adque preces miseras iterum decurrere cogit.  
Quocirca Omnipotens , ( quamvis hunc sæpius antè  
Expertus falsum , vanum scirétque futurum )  
Fortibus emissis Zephyris , auferre locustas  
Jussit , *Erythræo* & cunctas demergere ponto.  
Nec reliqua est ( mirum ! ) de tot modò millibus una.  
Lætatur *Pharao* tantâ sic peste levari ,  
Ignarus *Pharios* equites quæ fata manerent ,  
Nec metuens pariter fore se quoque piscibus escam ;  
Atque iterum cor indurat , neque jussa capeffit.

Hactenus Omnipotens , telis levioribus hostem  
Aggressus , pisces , pecudes , servósque peremit ;  
Annonámque omnem , & quæ nascebantur in hortis  
Numina perdiderat ; veterum memor usque minarum ,  
Queis primogenitos se perdere velle minatus.  
Státque immota fides , & cunctos tollere certum est ,  
Ni sapiat *Pharao* , & Populo concedat Eremum.  
At priùs ( en ) statuit Tenebras offundere terris ;

Quæ cæcas moveant mentes, moneântque futurum  
 Funus, ut & quales illas post fata manerent  
 Terrores, tenebræque, & inenarrabilis horror.

Protendit virgam *Mosès*, Erebumque recludit.  
 Tum Nox *Ægypto* viscosis horrida pennis  
 Incubat, involvens piceâ caligine terram ;  
 Qualem *Cimmeriæ* nunquam sensêre paludes :  
 Fingere nec tales bene sustinuêre Poëtæ,  
 Stagnantes tenebras, dibapham caligine noctem ;  
 Quam tres conati nequiêrunt vincere Soles.  
 Namque ter in tenebras vibrabat lumina Titan ;  
 Lumina ter tactis subito periêre tenebris,  
 Quæ nulla admittunt solatia luminis ; ignis  
 Confestim exspirat nigro carbone sepultus.  
 Omnibus abstulerat rebus nox atra colorem.  
 Inducti peplis cuncti, tenebrisque sepulti,  
 Cernere nil possunt, nec quâ vestigia flectant.  
 Quóque loco fuerat deprênsus, quisque manebat ;  
 Trésque dies totos in eadem sede moratur.  
 Crassior est solito & vix respirabilis aër.  
 Ipsa manus spissas potuit sentire tenebras.  
 Interea ultrices malè conscia pectora curæ  
 Exagitant Furiis, & cæco verbere cadunt.  
 Credibile est propriis intérque fuisse tenebris  
 Tartareos fratres, & concussisse catenas.

Ingens *Ægyptus* carcer , tenebræque catenæ.

Ast *Hebræorum* non deerat lumen in oris.

Ut primùm viduas terras lux alma revisit ,  
*Ægyptum* *Ægypto* reddens , vitâmq; sepultis ;  
En , *Pharao* , quanquam fuerat jam peste levatus ,  
Ulteriora tamen metuens , licitatur , ut antè ;  
Nec pretio redimi nimio vult séque suosque.  
Sacra Deo ut facerent Populo concesserat olim ;  
Immò in deserto , longè ni fortè recedant ;  
Deinde & Cultores cedit , sed non nisi adultos ;  
Nunc etiam totam sobolem. ast armenta gregesque  
Pernegat abduci ; vult hæc sibi præda supersint.  
Cedere nil ultrà certum est. hîc terminus hæret.  
Ergò aditu *Mosem* prohibet , mortémque minatur ,  
( Affirmátque minas *Moses* ) si deinde revisât.  
Sic postquam multis induruit ictibus incus ,  
Vel chalybem illisâ confringit vena rebellis.

Ultima jam restant ac decretoria tela ,  
Quæis Deus hostilis rumpétque repagula terræ ,  
Et Regem franget , belli nodúmque morámque.  
Jámque aderat nox illa , Deo sacrandâ per ævum ,  
Quæ foret *Hebræis* longè celeberrima Fastis ;  
Quâ Deus eriperétque suos de gente superba ,  
Ac *Pelnfiacas* impleret funere terras.

Contigerant medium volventia sydera cursum ,



Et consanguineus lethi sopor altus habebat  
 Mortales reliquos; at, Sacris ritè peractis,  
 Accincti stabant proles dilecta *Jacobi*:  
 Cùm subitò summo delapsus ab æthere listor,  
 Sidereo flagrans clypeo, & cœlestibus armis,  
 Pestiferum vibrat gladium per singula tecta;  
 Et Primogenitos omnes pecudúmque hominúmque  
 Conficit actutùm, quot habet *Memphitica* tellus.  
 Ast *Hebræorum* lustratas præterit ædes,  
 Ut vidit sacro respersos sanguine postes,  
 Magnáque præteriens mysteria pronus adorat.

Interea sonuêre cavæ plangoribus ædes,  
 Lamentis, gemitúque, & fœmineo ululatu.  
 Consonat omnis ager, resonat clamoribus æther,  
 Ac tota *Ægyptus* confusâ voce remugât.  
 Quis cladem illius noctis, quis funera fando  
 Explicet? *Hebræi* populi vel gaudia pandat?  
 Nam *Pharao*, excitus tanto terrore, cubili  
 Emicat, & *Mosè* pecudes, puerósque, virósque,  
 Omnia concedit. quin & jubet ocyùs omnes,  
 Fausta sibi optantes, *Phariâ* discedere terrâ;  
 Præcipitátque moras. Felix, si cedere primùm,  
 Tótque carere malis, dum res erat integra, nôisset.  
 At *Pharii* *Israële* sâtos urgéntque rogántque  
 Maturare fugam, nè pergat pestis in omnes



Desævire domos , ac totam perdere gentem.  
Nec piget ablatas gemmas , vestésque superbas ;  
Nec spoliis caruisse grave est , modò vita supersit.  
( Hæc jubet auferri rerum cui summa potestas ,  
Omnia pro libitu cunctis qui donat & aufert ,  
Hæc eadem statuens olim sibi sacra futura. )  
Sic tandem , post tot fastidia , damna , dolores ,  
Prægnans *Ægyptus* parere & parère coacta est ;  
Ac primogenitam gentem est enixa Tonanti.  
Ergò illi effugiunt aliorum hortatibus acti ,  
Prølubioque suo , tenebris famulantibus ipsis :  
Nec proficiscentes catulus latratibus urget ,  
Quanquam non parvo strepitu rapiuntque ruuntque.  
Agmine procedunt longo sexcenta virorum  
Millia , qui matres secum , puerósque , gregésque  
Innumeros ducunt ; quin & spolia ampla reportant.  
Dúxque viæ Deus ipse præit ; qui nube coruscâ  
Hinc noctem , indè diem , flammâ solatur , & umbrâ ,  
At veluti elapso vinculis durisque catenis  
Captivos miseros , sèque evalisse putantes ,  
Insequitur custos , iterúmque ad vincula reponcit :  
Sic *Pharao Isacidæ* , quamvis discedere jussos ,  
Nunc revocare cupit , *Pharii*que reponere terris ;  
Ereptámque dolens pinguem de faucibus offam ,  
E postliminio repetit quos nuper abegit ,

Perfidus, ingratus, non exorabilis, acer,  
 Præfractus, fastu inflatus, crudelis, avarus,  
 Contemptorque Dei, nullo emendabilis ictu.  
 Non mala tot passum fecere pericula cautum ;  
 Non modò sublatu mediis penetralibus hæres.  
 Si cor non vecors, si mens non læva fuisset,  
 Si non esset avara mali, ac pertæsa salutis,  
 Defineret tandem. Sed nullas audit habenas  
 Devotum exitio caput, in sua fata ruentis.  
 Urget dira fames & amor sceleratus habendi.

Qualiter insutam binis alvearibus urso  
 Rusticus objectat felem, parvæque fenestrâ  
 Mella linit, (generi ursino gratissima mella)  
 Illecebram pugnae, neque parvo vulnere cara ;  
 Ursus, stramineas ædes dum sæpe volutat,  
 Ingerit extensam comperto nectare linguam :  
 Improba sed felis, solitæque tyrannide sæva,  
 Quando aggressorem sentit jam cominùs hostem,  
 Unguibus hamatis lacerat crudeliter ora,  
 Lancinat & multo stillantem sanguine linguam.  
 Is fugit armatasque dapes, hostemque latentem,  
 Ac totas implet fœdis mugitibus auras,  
 Sanguineasque dapes odit, longèque recusat ;  
 Nec tantas meminit violati examinis iras.  
 At simulac torto respexit lumine mella,

Paullatim

Paullatim misero jam decrefcente dolore ,  
Vincit amor prædæ , pugnâmq; redintegrat urfus :  
Ac læsus toties iterûmq; iterûmq; recurfat ,  
Mella vorans , quamvis proprio commista cruore.  
Haud aliter *Pharao*. qui, postquam acceperat omnes  
*Hebræos* trepidante metu fugisse catervas,  
Implicitâsque viis sperans per senta locorum ,  
Sexcentos agiles currus , equitûmq; parari  
Innumeras turmas jussit ; quos ocyûs omnes  
Secum in bella rapit , fugientique imminet hosti.

Interea *Isacide* Rubri sub litore ponti  
Hinc atque hinc saxis inclusi castra tenebant.  
Quos ubi conspexit captos quasi retibus omnes ,  
Deprênsôsque loco *Pharao* , vi fervidus instat ;  
Spêque avidus totam jam cepit pectore prædam.  
Nec minor *Abramidas* metus & trepidatio cepit ,  
Instantes *Pharias* cum conspexere catervas.

At Deus , afflictis solitus succurrere rebus ,  
Propositique tenax , fidei certissimus obfes  
Tam relevare humiles , quàm præcipitare superbos ,  
Sæpiûs & quærens dignum se vindice nodum ,  
Hos interpositâ tutatur ab hoste columnâ ;  
Quæ lucem his præbet , sed noctem duplicat istis.  
Sic iter accelerâtque suis , hostémque moratur :  
Sic fovet ille suos simul & tutatur amicos ;

Non aliter pullos matris quàm protegit ala.

Pergere tunc *Mosèn* jubet, atque aperire profundum  
Protensâ virgâ. validi cùm protinus Euri

Accurrunt, adnixa humeris fluctûsque retrudunt.

Tum subitò ( horrendum visu, ac mirabile dictu !

Mirum, quod non ulla sâs mirabitur ætas ! )

Finditur Oceanus ; latè divellitur unda ;

Panditur & medio terrestris sēmita ponto :

Sēmita, quam nunquam lustrârat lumine *Phæbus*.

Quæque priûs fuerat ratibus spoliisq̃ sepulchrum,

Nunc iter *Isacidis* tutum præbebat arena,

Et planum, quamvis nullo curata cylindro.

Stant utrinque altæ, murus crySTALLINUS, undæ ;

Certatim & fluctus cumulum tolluntur in altum ;

Mirantûrque suis quis finibus ambulet hospes,

Depositum cœlorum, & Magni cura Tonantis ;

Accipiuntque sinu vasto populûmq̃ Ducēsque,

Exponuntque omnes ripæ ulterioris in ora.

Sed non & *Pharium* sic tractavêre Tyrannum ;

Qui calcare viam, stulto temerarius ausu,

Non sibi concessam voluit, mediûmq̃ tenebat

Jam maris. At *Moses*, iterum protendere virgam

Jussus, laxatas undis concedit habenas.

Confestim horrifico miscetur murmure pontus,

Æstu convulsus rapido, atque ruentibus undis ;

Qui

Qui *Pharios* involvit equos, currúsque, virósque,  
Frustrà oblucentes, frustra in vota vocantes  
Vel *Mosen*, *Mosifve* Deum. Nil vana Tyrannum  
Nunc promissa juvant. Omnes perduntur ad unum;  
Expertíque Duces, tota & delecta juvenus:  
Nec restat quisquam tanta de elade superstes;  
Litore sed latè sternuntur lumine cassi,  
Mortui & hostilis saltem potiuntur arenæ.

Vidère *Abramidae*, summo jam litore tuti:  
Vidit & hæc *Moses*, Summo sub Numine victor;  
Ac tales grato profudit pectore voces.

## ΕΠΙΝΙΚΙΟΝ.

“**C**Arminibus Summi nomen celebrabo *Jehovæ* :

“ Namque Is magnificos duxit lætósque triumphos.

“ Ille equites & equos demersit gurgite ponti.

“ Ille mihi robur, carménque, autórque salutis.

“ Est Deus Ille meus; cui mox habitacula condam:

“ Et patris Ille Deus; quem cantu ad sidera tollam.

“ *Jôva* est armipotens, ( huic nomen nempe *Jehovæ* )

“ Qui *Pharii* Regis currus, turmáque superbas,

“ Selectósque Duces Rubris demersit in undis.

“ Hausit eos gurgis; fundum petiére repentè,

“ Ut petere ima solent immani pondere saxa.

“ O Deus Alme, Tua est insignis robore dextra;

“ Quæ modò præfractos in fragmina contudit hostes:



- " Viribus atque Tuis fusi cecidère rebelles ,  
 " Quos vibrata Tui consumpsit flamma furoris ,  
 " Arentem stipulam rapidus ceu devorat ignis .  
 " Undas ipse Tui cogebat spiritus oris :  
 " Stabant erecti fluctus , velut agger aquarum ;  
 " Atque , gelu veluti , riguerunt viscera ponti .  
 " Insequar , assequar , & spoliabo , dixerat hostis ;  
 " Infigam quodcunque lubet , dictante furore ;  
 " Invadam stricto gladio ; dextrâque potenti  
 " Ad lateres iterum profugos furnosque reducam .  
 " At Tu , Magne , Tui spirabas flamine venti :  
 " Mox tumidos tumidis operibat fluctibus æquor ,  
 " Involvens unâ Regem , gentemque superbam ,  
 " Rectâ , ceu plumbum , qui præcipitantur ad imum .  
 " Quis fortes inter Te , Maxime , laudibus æquet ?  
 " Quisve Tui similis , Sanctis celebrandus , & idem  
 " Laudibus horrendus , faciens miracula rerum ?  
 " Dextram extendisti , mersosque involvit arena .  
 " Tu ( Bonus ) eduxisti Populum hunc ; Tua dextra redemit ,  
 " Adque Tuas sanctas duxit fortiter ædes .  
 " Audiet hæc populus longè , multumque tremiscet :  
 " Ipse *Palæstinæ* terrebitur incola terræ :  
 " Quin & *Idumæos* Satrapas stupefecerit horror ;  
 " Quotque *Moabus* habet fortes trepidatio prændet ;  
 " Et *Cananæorum* cunctorum corda liquefcent .



- “ Hos timor ac terror cunctos invadet, & omnes  
“ ( Te cogente animos ) immoti ut saxa quiescent,  
“ Donec *Jordanis* Populus transiverit undas ;  
“ O Deus Alme , Tuâ Populus virtute redemptus.  
“ Tu ( Deus ) inductum hunc Populum plantabis in ipso  
“ Monte Tuo , montes omnes superante , *Sione* ;  
“ Quem Tibi perpetuo statuisti jure tenendum.  
“ Nempe loco , quem mox habitandum , Magne *Jehova*,  
“ Tu Tibi designas, mundo nascente paratum ,  
“ Sedibus in sanctis , Tua quas Tibi dextera fixit.  
“ Plantatósque reget per secula mille *Jehova*.  
“ Ille etenim *Pharios* equites , Regémque , Ducésque ,  
“ Currúsque inductis demersit fluctibus omnes.  
“ Ille suo Populo , nato de stirpe *Jacobi* ,  
“ Tutum iter & ficcum mediis præstabat in undis.

Hæc in *Erythræo* cantabat litore Vates,  
Gaudentis Populi circumstipante coronâ ;  
Atque triumphato juvat evasisse Tyranno.

*Gloria in excelsis per secula mille Jehovæ ,  
Qui Dux , qui Vindex , quique Columna suis.*